

13 APR 1999

Zainal-buruh

MTUC MINTA DR MAHATHIR SELESAIKAN MASALAH BURUH DI SARAWAK

KUCHING, 13 April (Bernama) -- Kongres Kesatuan Sekerja Malaysia (MTUC) akan meminta bantuan Perdana Menteri Datuk Seri Dr Mahathir Mohamad untuk mempercepatkan proses memasukkan Akta Gunatenaga yang digunakan di Semenanjung ke dalam Ordinan Buruh Sarawak.

Presiden MTUC Senator Zainal Rampak berkata proses memasukkan akta tersebut, yang dilakukan oleh Kementerian Sumber Manusia dan kerajaan negeri Sarawak sangat perlahan.

"Pekerja di Sarawak tidak mendapat banyak manfaat dan perlindungan sebagaimana yang dinikmati oleh rakan sejawatan mereka di Semenanjung, dan kita tidak boleh membiarkan perkara ini berpanjangan," katanya pada sidang berita di sini hari ini.

Terdahulu, Zainal merasmikan kursus Keselamatan dan Kesihatan Pekerja, yang dianjurkan oleh MTUC cawangan Sarawak dengan kerjasama Pertubuhan Keselamatan Sosial (Socso) dan dihadiri lebih 30 pemimpin kesatuan sekerja di negeri ini.

Zainal berkata MTUC menerima banyak aduan daripada pekerja di Sarawak, mereka diberhentikan kerja dan gaji mereka dipotong tanpa rundingan terlebih dahulu.

"Saya sedih manfaat daripada akta gunatenaga itu tidak dapat dinikmati oleh para pekerja di Sarawak," katanya.

Menurut Zainal Ordinan Buruh Sarawak mempunyai banyak kelemahan, dan oleh itu ia tidak dapat memberi perlindungan yang secukupnya kepada pekerja di Sarawak.

Zainal berkata MTUC telah meminta supaya akta gunatenaga itu diperluaskan ke Sarawak sejak 10 tahun lepas, tetapi setakat ini tanpa kemajuan yang menggalakkan, oleh itu ia meminta jasa baik Dr Mahathir untuk menyelesaikan masalah itu.

Sementara itu, berkaitan Skim Pemberhentian Pekerja Kebangsaan (NRS) Zainal berkata skim itu akan diperluaskan ke Sarawak dan Sabah, bagi memastikan pekerja di kedua-dua negeri mendapat perlindungan berikutan pemberhentian kerja oleh para majikan.

"Saya sendiri akan memantau perkara itu dan akan memastikan skim itu diperluaskan ke Sabah dan Sarawak," katanya.

--BERNAMA

MT RI